



TEKS UCAPAN

**YB DATUK SERI SAIFUDDIN NASUTION BIN ISMAIL
MENTERI PERDAGANGAN DALAM NEGERI
DAN HAL EHWAL PENGGUNA**

SEMPENA

**MAJLIS PELANCARAN FOOD BANK SISWA
UNIVERSITI MALAYSIA PERLIS (UNIMAP)**

PADA

20 SEPTEMBER 2019 (JUMAAT)

TEMPAT

**DEWAN KECEMERLANGAN 2, KAMPUS ALAM UNIMAP,
PAUH PUTRA, PERLIS**

Assalamualaikum W.B.T dan Salam Sejahtera,

Mengadap,

Duli Yang Teramat Mulia Tuanku Syed Faizuddin Putra Ibni Tuanku Syed Sirajuddin Jamalullail, Raja Muda Perlis

Serta,

Duli Yang Teramat Mulia Tuanku Hajjah Lailatul Shahreen Akashah Khalil, Raja Puan Muda Perlis

Ampun Tuanku beribu ampun,
Sembah patik mohon diampun,

Patik merafak sembah menyembahkan ucapan setinggi-tinggi menjunjung kasih atas limpah perkenan Duli Yang Teramat Mulia Tuanku Raja Muda Perlis berangkat mencemar duli ke majlis ini dan seterusnya menyempurnakan **Majlis Pelancaran Program Food Bank Siswa di Universiti Malaysia Perlis (UniMAP)**.

Sesungguhnya keberangkatan Duli Yang Teramat Mulia Tuanku ke majlis ini memberikan satu mesej jelas keprihatinan dan sokongan daripada Institusi DiRaja ke atas program ini. Patik serta seluruh warga kerja Kementerian Perdagangan Dalam Negeri dan Hal Ehwal Pengguna sangat menyanjung tinggi dan amat menghargainya.

Patik memohon limpah perkenan Duli Yang Teramat Mulia Tuanku untuk mengalu-alukan kehadiran tetamu jemputan dan seterusnya menyampaikan ucapan di majlis pada pagi ini.

Ampun tuanku,

SALUTASI

ALUAN

**Ampun Tuanku beribu-ribu ampun,
sembah patik mohon diampun,**

1. Program Food Bank Malaysia (PFBM) ini adalah salah satu inisiatif yang dilaksanakan oleh Kementerian Perdagangan Dalam Negeri dan Hal Ehwal Pengguna (KPDNHEP) yang bertujuan untuk **membantu meringankan kos sara hidup rakyat dan menyelamatkan lebih makanan yang berlaku setiap hari.**
2. Kementerian ini telah melaksanakan program perintis pertama di Pulau Pinang pada Ogos 2018. Kejayaan program perintis ini telah dijadikan sebagai penanda aras untuk dilaksanakan ke beberapa buah negeri lain seperti Kelantan, Melaka, Johor, Perak, Selangor, Wilayah Persekutuan Kuala Lumpur dan Negeri Sembilan.
3. Patik mohon menyembah maklum ke sisi pengetahuan Duli Yang Teramat Mulia Tuanku bahawa program ini telah secara rasminya dilancarkan di Peringkat Kebangsaan pada **22 Disember 2018** di Kompleks Penyayang, Pulau Pinang.
4. Sehingga **Ogos 2019**, seramai **311,189 ahli isi rumah** telah berjaya mendapat manfaat daripada Program ini. Secara tidak langsung, Program ini juga telah berjaya menyelamatkan sebanyak **1,701 metrik tan lebih makanan.** Program ini adalah merupakan **satu program yang berterusan** dan bukan bersifat sementara (*ad hoc*) dan akan dilakukan secara berterusan.

5. Susulan **Mesyuarat Majlis Tindakan Sara Hidup Negara (NACCOL)** pada 15 Februari 2019, Kerajaan juga telah memutuskan untuk **meluaskan Program Food Bank Malaysia yang dikendalikan oleh Kementerian ini ke seluruh institusi pengajian tinggi** dan dikenali sebagai **Program Food Bank Siswa**.
6. Program yang sedang dijalankan di universiti-universiti awam ini merupakan inisiatif membantu mahasiswa yang memerlukan di samping membantu menangani isu kos sara hidup. Sasaran Kementerian adalah untuk **meluaskan program Food Bank Siswa ke 20 buah Universiti Awam di seluruh Malaysia menjelang penghujung tahun 2019**.
7. Kementerian melalui Yayasan Food Bank Malaysia telah mengambil inisiatif untuk menghubungkan pihak industri yang terlibat bukan sahaja pasar raya-pasar raya malah pengeluar produk makanan, restoran dan hotel dengan penggerak yang terlibat dalam membantu menyalurkan bantuan makanan kepada pihak Universiti.
8. Kementerian sedia maklum dan mengalu-alukan segala inisiatif yang telah diambil oleh pihak pengurusan IPTA dalam menyalurkan bantuan kepada mahasiswa yang memerlukan bantuan dan ingin membantu dalam melancarkan lagi pelaksanaannya dengan memperkenalkan Food Bank Siswa melalui **dua kaedah** iaitu:

- **Food Pantry:** penyimpanan barang makanan kering di satu bilik yang sesuai dan diuruskan oleh Persatuan Mahasiswa yang ditugaskan. Mahasiswa yang layak menerima bantuan Food Bank Siswa ini boleh mengambil makanan yang akan diagihkan mengikut jadual yang ditetapkan.
 - **Central Kitchen:** sumbangan makanan yang boleh dimasak seperti sayur-sayuran dan buah-buahan akan dimasak dan diberikan kepada mahasiswa yang layak menerima bantuan Food Bank Siswa.
9. Inisiatif Food Bank Siswa ini berkonsepkan “**Daripada Mahasiswa kepada Mahasiswa**” di mana kita mengalu-alukan mahasiswa yang ingin terlibat dalam melaksanakan Food Bank Siswa ini terutamanya dari **Persatuan-Persatuan Mahasiswa untuk sama-sama membantu golongan mahasiswa yang memerlukan**. Sehingga Julai 2019, sebanyak **3,820 mahasiswa** telah menerima manfaat daripada program ini.
10. Selain memastikan golongan mahasiswa yang merupakan pelapis negara dapat menimba lebih banyak pengalaman dalam pelaksanaan program kebajikan, ia juga **memupuk semangat sukarelawan** di samping dapat **bergiat aktif di dalam aktiviti yang dijalankan di Universiti**.

Ampun Tuanku beribu-ribu ampun, sembah patik mohon diampun,

11. **UniMAP adalah Universiti ke-16** sejak Program Food Bank Siswa ini dilancarkan. Sebagai permulaan pelaksanaan program ini, seramai **150 orang mahasiswa** telah dikenal pasti dan layak menerima bantuan daripada program ini. Sehingga September 2019, sebanyak **4,820 pelajar** telah menerima manfaat daripada program ini.

12. Patik juga berbesar hati dengan penyertaan pihak yang terlibat sebagai **rakan penaja** bagi program ini seperti:
 - i. **GCH Retail (M) Sdn. Bhd. ;**
 - ii. **Gardenia Bakeries (KL) Sdn. Bhd. ;**
 - iii. **IPTB Sdn. Bhd. ;**
 - iv. **Pen Petroleum Sdn. Bhd. ;**
 - v. **LiteFinance Malaysia, Pasaraya Hafifah (M) Sdn. Bhd. ;**
 - vi. **Dibuk Sdn. Bhd. ;**
 - vii. **Raffi Brother Sdn. Bhd. ; dan**
 - viii. **Pasaraya Amwan**

13. Patik mohon menyembah maklum ke sisi pengetahuan Duli Yang Teramat Mulia Tuanku bahawa Program Food Bank Siswa UniMAP ini akan digerakkan oleh **Persatuan Kebajikan Usahawan Mikro Malaysia (PKUMM)** dan **Sukarelawan Food Bank UniMAP** dan berkonsepkan ***Food Pantry*** dan ***Central Kitchen***.

14. Patik berharap agar Program Food Bank Siswa UniMAP ini **berjaya dilaksanakan secara berterusan dan mendapat kerjasama yang tidak berbelah bahagi oleh setiap pihak yang terlibat.** KPDNHEP bersedia untuk menerima apa-apa cadangan dan maklum balas agar sistem penyampaian bagi program ini dapat berjalan dengan lebih lancar.

15. Di kesempatan ini patik merafak sembah mohon ampuni limpah perkenan Duli Yang Teramat Mulia Tuanku bagi patik mengalu-alukan dan merakamkan ucapan penghargaan serta terima kasih kepada tetamu yang hadir pada petang ini, dan kepada semua pihak yang terlibat dan bekerjasama untuk program ini. Patik berharap program ini akan dapat dijayakan dengan cemerlang dan berterusan sebagai inisiatif membantu mahasiswa yang kurang berkemampuan.

Ampun Tuanku. Sekian sahaja persembahan ucapan patik.

Patik-patik sekalian mengambil kesempatan di sini mendoakan agar Duli Yang Teramat Mulia Tuanku dan Duli Yang Teramat Mulia Tuanku Raja Puan Muda akan senantiasa dirahmati Allah SWT dengan dikurniakan kesihatan yang baik serta keberkatan dan kekuatan untuk terus bersemayam di atas singgahsana pemerintahan dengan penuh kebesaran, kedaulatan dan kemuliaan hendakNya.

Ampun Tuanku.

Sekian, *Wabillahitaufiq Walhidayah Wassalamualaikum Warahamatullahi Wabarakatuh.*

Nota tambahan:

Senarai Universiti yang telah melancarkan Program Food Bank Siswa:

1. Universiti Kebangsaan Malaysia (UKM) Cheras;
2. Universiti Malaya (UM);
3. Universiti Teknologi MARA (UiTM) Pulau Pinang;
4. Universiti Putra Malaysia (UPM);
5. Universiti Teknologi Malaysia (UTM) Skudai;
6. Universiti Sultan Zainal Abidin (UniSZA);
7. Universiti Teknologi Malaysia (UTM) Kuala Lumpur;
8. Universiti Malaysia Sarawak (UNIMAS);
9. Universiti Malaysia Sabah (UMS);
10. Universiti Pendidikan Sultan Idris (UPSI);
11. Universiti Teknikal Malaysia Melaka (UTEM);
12. Universiti Sains Malaysia (USM);
13. Universiti Utara Malaysia (UUM);
14. Universiti Tun Hussein Onn Malaysia (UTHM); dan
15. Universiti Sains Islam Malaysia (USIM).